

Här Claude Wiseler
President vun der Chamber



Lëtzebuerg, den 28. Abrëll 2025

Här President,

Esou wéi d'Chambersreglement et virgesäit, bieden echlech, dës parlamentaresch Fro iwwert **Stagen am Secondaire** un den **Här Minister fir Educatioun, Kanner a Jugend** weiderzeleeden.

Stagë si fir d'Schüler*innen eng Méiglechkeet, hir Fäegkeeten duerch e praktesche Kontext ze erweideren, wat si op d'Beruffswelt virbereet. Dës realitéitsno Erfahrung kann dobäi hëllefen hir kognitiv Fäegkeeten ze stäerken a hir sozial Kompetenzen ze fërderen. Andeems Schüler*inne mat berufflechen Aufgaben a Kontakt kommen, entwéckele si Selbststännegkeet an e Gefill fir praktesch Aufgaben, déi hinnen an hirer perséinlecher a berufflecher Zukunft hëllefräich kënnen sinn.

Stagë vun enger Woch (sougenannt "Schnupperstagë") si fir Schüler*innen am Enseignement secondaire général (ESG) obligatoresch. Fir d'Schüler*innen aus dem Enseignement secondaire classique (ESC) sinn dës Stagen optional.

Eenzel Lycéeën bidden haut scho Programmer un, fir hir Schüler*innen aus dem ESC ze encouragéieren an dobäi ze ënnerstëtzen, Schnupperstagen ze absolvéieren.

An dësem Kontext erlaben ech mer folgend Froen un den Här Minister ze stellen :

1. **Wat fir Effekter hunn déi obligatoresch Schnupperstagen op d'Beruffsvirbereedung vun de Schüler*innen am ESG? Goufen dës Stagë schonn evaluéiert a wa jo, wat sinn d'Resultater vun der Evaluatioun? Wann nee, wäert de Minister eng Evaluatioun an d'Weeër leeden?**
2. **Firwat sinn d'Schnupperstagë fir Schüler*innen am ESC net obligatoresch?**
3. **Wier et net sënnvoll, och fir d'Schüler*innen am ESC en obligatoresche Schnupperstage anzeféieren, fir och hinnen eng éischt Erfahrung an der Beruffswelt ze erméiglechen?**

4. Wéi vill Lycéeën bidden haut scho Programmer, fir Schüler*innen aus dem ESC dobäi ze ënnerstëtze Schnupperstagen ze fannen an ze absolvéieren? Wéi vill Schüler*innen am ESC hunn duerch dës Programmer iwwert déi lescht 5 Joer vun engem fräiwëllege Stage profitéiert?
5. Wäert den Här Minister an Zukunft och aner Lycéeën encouragéieren, fir esou Programmer unzebidden?

Mat déiwem Respekt,



Djuna Bernard
Deputéiert



**Äntwert vum Minister fir Educatioun, Kanner a Jugend, Claude Meisch, op d'parlamentaresch Fro
Nr. 2258 vun der honorabeler Deputéiert Djuna Bernard**

- 1. Wat fir Effekter hunn déi obligatoresch Schnupperstagen op d'Berufsvirbereedung vun de Schüler*innen am ESG? Goufen dës Stagë schonn evaluéiert a wa jo, wat sinn d'Resultater vun der Evaluatioun? Wann nee, wäert de Minister eng Evaluatioun an d'Weeër leeden?**

Schnupperstage sinn integrale Bestanddeel vum Curriculum op den ënneschte Klasse vum Enseignement secondaire général (ESG). Am Kader vun der Orientatioun sinn se e wichtegt Element fir d'Berufswelt kennenzeléieren, dës niicht aneren Elementer wéi zum Beispill de villfältegen Offere vun der *YEP-Schoulfoire*. Si hëllefen deemno dem Schüler, säin zukünftege berufleche Parcours ze definéieren.

Eng Evaluatioun vun de Stagen ass effektiv vu grousser Wichtigkeet, notamment am Kontext vun der Reform vun den ënneschte Klasse vum ESG a vun der Promotioun vun der Berufsausbildung. Dës Evaluatioun ass dofir am Regierungsprogramm virgesinn: « *Le système actuel de stage sera analysé, évalué et adapté.* ».

- 2. Firwat sinn d'Schnupperstagë fir Schüler*innen am ESC net obligatoresch?**
3. Wier et net sënnavoll, och fir d'Schüler*innen am ESC en obligatoresche Schnupperstage anzeféieren, fir och hinnen eng éischt Erfahrung an der Berufswelt ze erméiglechen?
5. Wäert den Här Minister an Zukunft och aner Lycéeën encouragéieren, fir esou Programmer unzébiden?

Déi éischt Finalitéit vum Enseignement secondaire classique ass et, d'Schüler op Universitäts- an Héichschoulstudie virzebereeden; aus deem Grond hat de Volet vun de Stagen an deem Ordre d'enseignement bis elo keen obligatoresche Charakter.

An enger Gesellschaft, déi sech séier verännert, dës notamment am Beräich vun der Aarbechtswelt, ginn awer haut Erfarungen an de Betriber als primordial consideréiert. Aus deem Grond gesäit de Regierungsprogramm vir, datt och d'Schüler aus dem ESC sollen d'Méiglechkeet kréien, Stagen ze absolvéieren (« *Des stages en entreprises pour les élèves de l'ESC seront offerts.* », Accord de coalition, p. 125).

- 4. Wéi vill Lycéeën bidden haut scho Programmer, fir Schüler*innen aus dem ESC dobäi ze ënnerstëtze Schnupperstagen ze fannen an ze absolvéieren? Wéi vill Schüler*innen am ESC hunn duerch dës Programmer iwwert déi lescht 5 Joer vun engem fräiwëllege Stage profitéiert?**

Follgend Lycéeën organiséieren am Beräich vum ESC Stage fir hir Schüler:

AL, ALR, EIDE, EIMLB, LAML, LBV, LCD, LCE, LEM, LESC, LGE, LGK, LGL, LLIS, LMA, LML, LN, LNB, LRSL, LTL, MLG, NOSL, SLL, SLP

D'Zuel vu Schüler, déi Stagen absolvéiert hunn, geet aus dësem Tableau ervir:

2019-2020	2020-2021	2021-2022	2022-2023	2023-2024
1.068	1.330	1.640	1.798	1.873

Lëtzebuerg, de 6. Juni 2025

De Minister fir Educatioun,
Kanner a Jugend

(s.) Claude MEISCH